

## لما كنت صغيرة

لما كنت صغيرة

كنت بشبه عيّل تنك

معروف عنه الألاطة

لكنه حابب الحياة

عاشها ببساطة

خطى فيها تاتا تاتا

تاht عنيه في سحر السما

بص للنجوم ضحك

بص للغيوم بكى

حس بالتعب إشتكى

لما كنت صغيرة

كنت بشكي وكنت ببكي

كنت قادرة ساعتها أحكي

عارفة أحدد إيه بيوجعني

ووجعه فين

كنت فاكرة

إنه معنى الجرح دم

مكنتش أعرف إنه بكره

ومن سكات..هنزف حنين

ولا كان بيقدر وشي يضحك

وأنا قلبي دقاته أنين

لما كنت صغيرة

مكنتش أعرف يعنى إيه متحيرة

أو تبقى إيدى قصيرة

مش طائلة بكرة

أنا لسه فاكرة

الفرحة بالزينة

وفانوس رمضان  
وونسي في اللمة  
وفاكرة كمان لما  
كنت بنام.. وبحضن الفستان  
والفرحة بالعيدية  
وأما أبات في ليلة عيد ميلادى  
أحلم بالهدية  
كنت بستغرب أوي  
مالى بدنندن للزمن يرجع..  
أنا عاوزه أيامي اللي جاية!  
لما كنت صغيرة  
كان حلمى أكبر  
ولما كبرت  
يمكن فهمت أكثر..

إتعلمت أسهر..  
وأبات مشغولة أفكر..  
وبدون أسباب ألاقى  
مزاجي متعكر  
فبدون تفكير أقرر  
بأن الطفلة جوايا  
لا هتكبر ولا هتعقل  
ولا يوم هتتغير  
قررت مهما كبرت..  
يفضل قلبي صغير